

# TPM persoal data 80 peratus kanak-kanak tonton pornografi

**SERDANG** – Malaysians Against Pornografi (MAP) perlu memberikan pencerahan mengenai metodologi kajiannya yang mendapati kira-kira 80 peratus kanak-kanak serta remaja berusia antara 10 hingga 17 tahun menonton pornografi secara sengaja pada 2018.

Timbalan Perdana Menteri yang juga Menteri Pembangunan Wanita, Keluarga dan Masyarakat, Datuk Seri Dr. Wan Azizah Wan Ismail berkata, cara kajian itu dilaksanakan perlu diperjelaskan secara terperinci.

“Memanglah keputusan itu sesuatu yang membimbangkan, namun dapatan itu perlu dihuraikan dari segi bagaimana kajian itu dilakukan,” katanya selepas merasmikan Seminar Sukarelawan Hospital Kebangsaan di Fakulti Perubatan dan Kesihatan Universiti Putra Malaysia (UPM) di sini semalam.



**WAN AZIZAH** (tengah) bersama sebahagian peserta Seminar Sukarelawan Hospital Kebangsaan di Fakulti Perubatan dan Kesihatan UPM, Serdang semalam.

Beliau berkata demikian bagi mengulas mengenai laporan media kelmarin bahawa kira-kira 80 peratus kanak-kanak berusia 10 hingga 17 tahun menonton pornografi secara sengaja.

Menurut Wan Azizah, Kajian Penduduk dan Keluarga Malaysia kelima pada 2014 pula

menunjukkan 35.3 peratus individu berusia 13 hingga 24 tahun terdedah pornografi.

Katanya, daripada jumlah itu, 60.8 peratus memperolehnya daripada internet, telefon pintar (45 peratus) dan cakera padat atau cakera padat digital lucah (20 peratus).